

## LIČNI ODNOSI ISPREPLETENI INTERESIMA STRANKE - ZBOG PRIJATELJSKIH ODNOSA SA KOMŠIJOM, GLASLA KAKO ON ŽELI - LISTIĆI SLIKANI KAO DOKAZ

### Komšijske kafe sa skrivenim „stranačkim“ motivom

U jednoj lokalnoj zajednici, građanka (28 godina) se pred opšte izbore 2022. godine našla u situaciji da je primorana glasati za koga ne želi zbog stalnog vršenja pritiska od strane komšije koji je bio vjerni aktivista stranke i kandidata za koje ju je nagovarao da glasa. Navodi da je na početku više puta dolazio na kafu uvjeravajući je za koga treba glasati. Posjete su postale toliko učestale da su njoj i njenim bližnjima, takve situacije postale neugodne i da nisu bili sigurni šta da rade.

### Sve češći pozivi

Na samom početku, navodi da su im pružana i neka pozitivna obećanja, kao što je popravak puta u njihovoj lokalnoj zajednici ili uspostavljanje rasvjete, koja će se ostvariti ako glasaju za određenu stranku. Međutim, vrlo brzo, postala je izložena svakodnevnim pozivima na telefon, a sve s ciljem da bi glasala, onako kako se od nje traži.

### Glasanje zarad prijateljsko-komšijskih odnosa

U usko povezanoj zajednici, dobri odnosi među komšijama igraju značajnu ulogu, te da bi sačuvala dobrosusjedske odnose i prestala se izlagati neugodnim situacijama i pozivima, ona, njena majka i

njen momak su pristali glasati onako kako im je rečeno.

### Fotografisanje glasačkog listića

Ipak, tu nije bio kraj. Bez obzira što su rekli da će glasati onako kako njihov komšija želi, ipak su to morali i dokazati. Na sam izborni dan, navodi da je njen momak uslikao sva tri glasačka listića i poslao ih kao dokaz komšiji da su ispunili svoju komšijsku dužnost.

### Lični odnosi isprepleteni interesima stranke

Gradanka navodi da su zbog prijateljsko-komšijskih odnosa i navodnih koristi za zajednicu, osjećali obavezu da glasaju kako je to diktirano pritiscima koji ih okružuju. Jasno im je i da su lični odnosi među ljudima isprepleteni interesima stranke.